

Pauro Epeso ezektsa bo ziwatahaka

Pauro Epeso ezektsa tuk niapykyrykspyk petok ziytyk tsehe. Sesus soho ty nisispirikpoko iwaze mekybotu niparakzo. Aibatohi Pauro sakyriukanikitsa hurukwy eze niapykyryk. Sesus soho kytsa nisispirikpoko iwatsahi kytsa sakyriukanikitsa hurukwy zioқтыhyryk anaeze hi Epeso ezektsa bo ziwatahaka, Deus soho ty nisispirikpoko. Deus hyrikoso ituk niapykyryk iwatahi Deus harere ziwatahaka, abaka katsa kino niwatihi iwatahaha humo tanymyryky.

¹ Uta Pauro. Deus zikwatawy iykzoho my ikiahatsa Epeso ezektsa bo piwatahaka. Ikiahatsa Sesus Kiristu harere bo hyỹ tsimykaranaha iwatsahi ahaspirikporëtsa. Tubabatu Deus kape niy:

— Ikia myzubahatsa bo tsimy. Wasaniha ty sibo tyt-sasoko — niy.

Yhỹ icy.

² Uta tihi:

— O Deus myzo. Sesus Kiristu mypehakatsa my hỹ. Ikiahatsa Epeso ezektsa bo tysisapywyky. Ahahumo sakurëtsa moziknaha hỹ — my. Iwa Deus bo ahatsyhyryze ikpamykysoko hỹ.

Kiristu humo Deus mymysapywyikik.

³ Kyze katsaktsa Deus Sesus Kiristuzo bo tsimy-pamykysoziukunahaktsa kytsa! Atahi isapyrënikia ty mybo nyny niy. Atahi ihyrikoso mybo zipaha atakta mytuk mynapykyryk hỹ. Iwatsahi katsa:

— O Deus ikia zuba tsamysapyrëta. Ikia amysakihikynikita ahumo ka mykurëtsa — tsimykaranaha. ⁴ Deus

mybarawy nizukni. Isuknihibyize katsa ityryktsa nimywatawy. Nawa Sesus Kiristu tuk nimywatawy. Tubabatu katsa mysapyrëtsa nimysukni tsihikik iwatahi nimywatawy. Deus tatyryktsa bete nimysukni iwa nizihikik asaktsa pisapywyikiknaha iwatahi Kiristu nimywatawy.

Tapara myhyritykyhybyri eze myhumo tsimypokzitsiarëta. ⁵ Atahi nimysukniwy iwatsahi ihyrytsa babatsa tsimoziknaha. Sesus Kiristu mymytsumuëhĩ naha humo hi tsihyrinymyrëta iwaze ihyrytsa babatsa tsimoziknaha iwa niyzihikik. Katsaktsa ihyrytsa babatsa tsimoziknaha iwa tatu tuka nikara. ⁶ Iwaze Deus bo tsimysakibazikiknahaktsa!

— O Deus myzo ikia myhumo ka tsamypokzitsiarëta. Iwatahi Sesus mybo zipaha mymytsumuëhĩ, iwaze mybarawy ezektsa bo inasik mywata niyzik. Ikia zuba tsamysapyrëta. Batu aty tohi ikia wata. Katsa tynamysapywyikik batu ihuakbaratu tsimyzihikik iwatsahi ahumo mykurëtsa. Ikia wasani hỹ — tsimykaranaha.

⁷ Deus tse babata myhumo tsimypokzitsiarëta ituk hi tsimynapykyknaha. Iwatsahi mykurëtsa. Atahi mysapyzekeniyirikosokda. Kytsa iharapatawyhyta humo zihyrikiziknaha iwaze zibezena. Iwaze Deus bo mymyoktyhyryk. Nihyrikosokdaze imysapybara ty tsikykaranaha ana humo hi Deus nimyokzohik ihumo nispiriktsokda. Hawa batu imysapy tsimykaranaha abaka batu mykparawy. Deus tse humo mymysapywyikik. ⁸ Iharere baba ana kino mybo nitsasoko ana humo hi hyỹ tsimykaranaha iwatsahi myspirikporëtsa.

⁹⁻¹⁰ Iharere Sesus soho tisapyrëna hỹ. Tubabatu Deus tihi:

— O Kiristu zipehata sizubarëtsa pehatsa mozik. Nanabyitaba abazubata mozik. Bijoikpe ezektsa mybarawy ezektsa kino niwatihi iharere bo zuba hyỹ mynakaranaha

— niy. Abaka iharere tsinymyrynaha. Iharere mybo motsasoko. Nawa puruze piwatawy iharere Kiristu soho wasani my iwa botu nikara. Aba atsatu mybo motsasoko.

¹¹⁻¹² Tapara katsaktsa Sudeutsa tsimaha Kiristu tapyrykik. Atahi Deus bo mymyoktyhyryk ata hi tapyryky. Tubabatu Deus nimywatawy, Kiristu harere bo hỹ tsimaha iwatsahi myspirikporētsa tsimoziknaha anahi nizihikik. Mysapyrētsa tsimoziknaha niyzihihikik. Iwaze kytsa sizubarētsa tihi:

— O Deus ikia zuba tsamysapyrēta myzubatsa atyryktsa moziknaha. Simysapyrētsa moziknaha iwatahi tsamysapyrēta — mykaranaha. Katsaktsa Kiristu humo wasani tsimykaranaha ana humo hi sihyrinymyrētsa iwaze Deus bo motsasoziukunaha. Hawa Deus motsaso atsatu mykara. Iwatsahi Sesus Kiristu harere bo hỹ tsimykaranaha h̃y.

¹³ Ikiahatsa Sudeutsabyitsa mytuk mykaranaha. Ikiahatsa niwatihi Kiristu tuk tsimynapykyknaha h̃y. Deus wasaniha humo mymyoktyhyryk ana soho botu tsiwabynaha iwatsahi iharere bo hỹ tsimykaranaha. Sesus Kiristu humo tsikspirikponahaze Deus hyrikoso ahabo zipaha. Ihyrikoso ahatuk mynapykyryk.

Kytsa tahanamy humo tahanaro ziwatahakanaha iwaze ustsya kytsa sinamy pinynahaze ana humo hi sihyrinymyrētsa. Ana wa hi Kiristu harere humo Deus hyrikoso ahabo zipaha iwaze ityryktsa tsimoziknaha ana humo hi ahahyrynymyrētsa h̃y. ¹⁴ Deus hyrikoso mytuk mynapykyryk bykyze Deus isapyrēnikia ty mybo nyny my. Sesus tuktsa myzubarētsa bo Deus isapyrēnikia ty botu ziperyknaha ana kino mybo nyny my. Iwa botu nitsaso. Iharere wasani my. Ana kino tsinymyrynaha. Deus hyrikoso mybo zipaha iwa iharere soho tsinymyryknaha. Imysapybyikia ty batu

mykparawy iwaze isapyrënikia ty zuba mybo nyny my nawa botu nitsaso atsatu my. Iwatsahi katsaktsa:

— O Deus myzo ikia zuba tsamysapyrëta. Ikie zuba tsapunihikrëta — tsimykaranaha hỹ.

Pauro Epeso ezektsa tsyhyryze Deus bo nipamykysoko.

¹⁵ Kyze kytsa ahasoho kabo nitsasokonaha. Siharere tisapyrëna. Asahi:

— O Epeso ezektsa Sesus harere bo hỹ mykaranaha iwatsahi sispirikporëtsa maha. Tyhapepokzitsikinaha — nikaranaha.

¹⁶ Ana humo ziwabyze ahatsyhyryze Deus bo mopamykysoko. Deus pahasapywy tsihikik ibo hi mopamykyso. Kakurëta ibo mopamykysoikik utahi:

¹⁷ — O Deus myzo. Sesus Kiristu mypehakatsa my. Ikie Sesus Kiristu pehatsa tsimy. Myzo ikia zuba tsamysapyrënikita. Epeso ezektsa tsysitsumuëhikta! Hawa ja mozurukunaha tsihyrinymyryky. Sihyrinymyrëtsa zeka ahumo sispirikporëtsa, ana humo kino myzapykyky.

¹⁸ Ikie isapyrënikia ty sibo nyny tsimy. Sesus tuktsa sizubarëtsa isapyrënikia ty sibo nyny tsimy. Iwa botu tsiktsaso. Myzo isapyrënikia ty tsipiperykynaha. Tsipiperykynahaze tymytsumuëhikta myzo, tsimaha.

¹⁹⁻²⁰ Ikie zuba tsapunihikrëta ba hawa tohi zasukninaha. Kiristu nihyrikosokdaze ikie hi tsikzihyrizikpowyhykzo. Ikie humo bijoikpe bo nido abaze apanuryk taba modyhyky. Ikie tuk kytsa mysipehaka. Azikwy ty Epeso ezektsa Sesus tuktsa sisopyk azikwy tuk mozurukunaha.

²¹ Atakta abazubata my. Myzubatsa iharere bo hỹ mykaranaha. Bijoikpe iknyktsa iharere bo hỹ mykaranaha. Hyrikoso sapybara wakatsa kino iharere bo yhỹ mykaranaha. Mybarawy ezektsa pehatsa sizubarëtsa

iharere bo hỹ mykaranaha. Atahi abazubata tsizik-wyrēta h̃y. ²²⁻²³ Sesus Kiristu hi mybarawy ezektsa iharere bo hỹ mykaranaha. Atakta koikny bakta tu batu amy tohi mykara iwatahi tsihyrinymyrēta h̃y. Ihyrikoso nanaby-itaba my. Ihyrikoso mytuk mynapykyryk. Iwatahi Sesus Kiristu mype niy:

“Ikiahatsa kanury wata” niy. Hawa kytsa tahanury nisipehakanaha nawa Sesus Kiristu ituktsa mysipehaka. Ikiā Sesus Kiristu tuktsa humo tsamypokzitsiukrēta. Iwaze ikia Sesus Kiristu humo tsimymysapywyikik myzo — my. Iwa ahatsyhyryze Deus bo mopamykysoko.

2

Kiristu humo myspirikporētsa tsimoziknaha.

¹ Tapara ikiahatsa ahamysapybyitsa tsikykaranaha iwaze Deus okzeka batu ahaspirikpo iwatsahi siakbatsa watsa tsikykaranaha. Deus harere bo batu h̃y tsikaha. Hawa siakbatsa sityryk niakba naha tsa wa. Iwa batu ahaspirikpo. Deus zahasapywyky ihumo mekywa tu tsimoziknaha ihumo mekywa tu tsimyzurukunaha.

² Taparaka sispirikpobyitsa harere bo yh̃y tsikykaranaha. Asaktsa Satanas hyrikoso sapybara pehatsa harere pi-wabyziukunaha siharere bo kino yh̃y tsikykaranaha. Satanas bijoikpe ikny mybarawy bo izumu anaeze mozuruku. ³ Katsa Sudeutsa niwatihi ahawatsa zikzurukunaha. Mysapybyitsa tsikykaranaha, hawa mytsaty tsikykaranaha ana kino mysopyk. Taha bo zuba zik-nakaranaha. Katsaktsa wasani tsimaha mytsaty ahabyitsa tsikykaranaha iwa mypetu mysopyk. Deus mype niy:

— Ikiahatsa Sudeutsa ustsā kytsa watsa tsimaha, kaokzeka batu ahamysapy tsimaha. Sinini ykarawy bo pahapehahik — niy.

⁴ Deus hiba myhumo tsimypokzitsiarêta. Katsaktsa iharere bo ma mysopyk byitsa tu iwatatu myhumo imysapyrêta mymysapywy tsihikik hÿ. ⁵ Katsaktsa tsikyhyrikosokdanahaze iwaze myspitu tsikyzikzonaha tsawatsa. Katsaktsa mysapybyitsa tsikykaranaha iwaze siakbatsa watsa Deus inamyhyrizikpowyhikzo. Sesus wata inamyhyrizikpowyhikzo iwatsahi iharere bo zuba hyÿ tsimykaranaha. Iharere zuba mykparawy iwa hawa Deus mozihikik katsa kino niwatihi tsimyzihikiknaha. Ana humo niyze mynamy batu ziakse. Batu amy tohi ty zihuaknaha. Atahi myhumo tsimypokzitsiarêta babata iwa niy.

⁶ Deus Kiristu zihyrizikpowyze jobo bijoikpe bo nido. Anaeze ituk tawahi mynapykyryk. Katsa kino niwatihi iharere bo hyÿ tsimykaranahaze isoho bo mytsaty tsimykaranaha. Botu Sesus Kiristu tuk tsimynapykyryknaha, mybarawy ezektsa Deus hyrikoso botu namykse iwatsahi ituk tsinapykyryknaha hÿ. ⁷ Deus myhumo tsimypokzitsiarêta iwatahi Kiristu Sesus nimitysumuêhîkî. Nimitysumuêhîze hawa Deus mozihikik ziwatawyky. Isapyrênikia mybo pinyny tsihikik ana hi tsinymyrykynaha. Utsa kytsa mysoho tihi:

— Hawa Deus mysisapywyky — mykaranaha.

⁸ Deus myhumo tsimypokzitsiarêta iwatahi mymysapywyky. Sesus izumuze tazo bo mymyoktyhyryk niy. Katsa zuba zeka Deus bo ba zikumunaha. Iwatahi Deus myzo Sesus zipedahik atahi Deus bo mymyoktyhyryk ihumo zuba Deus tyryktsa tsimoziknaha hÿ. Katsa ibo batu amy tohi ihuak ty nyny zikaha. Deus zuba isapyrênikia ty zuba mybo nyny niy.

⁹ Katsaktsa Deus tyryktsa tsimoziknaha. Deus hi tatyryktsa nimysukniwy iwatsahi katsa batu tyso.

— O mysapyrētsa iwatsahi Deus tyryktsa tsimoziknaha — tsimaha. Iwa batu aty tohi tyso. Deus zuba katsa ityryktsa nimysukniwy Sesus humo Deus bo mymyoktyryk my. ¹⁰ Abaka Deus tyryktsa tsimaha mekywa tu tsimoziknaha. Sesus Kiristu harere bo hyŷ tsimykaranaha iwatsahi ihumo myspirikporētsa mekywa tu tsimyzurukunaha. Sesus tuktsa sizubarētsa ihumo simysapyrētsa moziknaha. Tubabatu Deus tihi:

— O katyryktsa Sesus Kiristu watsa mozurukunahaze ana kino mozihikik. Utsa kytsa mysitsumuēhīnaha iwa mozurukunaha hŷ — niy.

Iwaze mymytsumuēhīnaha nawa kytsa bo mozihikik atsa tu mymytsumuēhīkīnaha hŷ.

Parakbaha Deus tyryktsa tsimoziknaha.

¹¹⁻¹² Tapara ahaspirikpobyitsa zikzurukunaha. Ana bo mytsatytaha Kiristu harere bo batu hŷ tsikaha isoho humo batu ahaspirikpo. Ikiahatsa Sudeutsabyitsa tsimaha. Ahanury humo iwatawyhybyitsa Deus wasania ty batu ahawabyhy. Sudeutsabyitsa tu batu Isareu tsekokatsa ka. Bipyritsa tsikaha. Deus wasania ty Sudeutsa ziperykynaha ana kino batu ahawabyhy iwatsahi hawa tisapyrēna batu mytsaty tsikykaranaha. Deus kytsa mysitsumuēhī tsihikik ana humo hi batu ahahyrinmyry.

¹³ Abaka meky watu tsimaha. Wasani tsimykaranaha. Sesus Kiristu iharapatawyhyta humo zihyirizikiknaha iwaze zibezenaha. Mysapyzekenihyrikosokdaze Deus bo mymyoktyhyryk niy. Katsa ihumo myspirikporētsa tsikyziknaha iwaze Deus bo mymoktyhyryk. Iwatsahi ahape mysopyk mytukytsa tsimykaranaha. Batu bipyritsaka tsimaha. Myzubarētsa iharere bo zuba hyŷ tsimykaranaha.

¹⁴ Taparaka katsa sisukyrytsitsa abaka myzubarëtsa Kiristu harere bo hyÿ tsimykaranaha iwatsahi taharapepokzitsikinaha. Sudeutsa, Sudeutsabyitsa kino niwatihi ihumo myspirikporëtsa iwaze myharereziuwytza tsi-moziknaha. Taparaka metutu ziknakaranaha ipokpedawy waha abaka ihumo nihokda. Katsaktsa ikiahatsa kino niwatihi Deus tyryktsa tsimaha.

¹⁵ Tubabatu Deus harere Moises bo nitsaso. Anaharere Moises ziwatahaka. Sudeutsa anaharere tsizubarëna bo yhÿ ziknakaranaha. Tsihokdaharëna. Anaharere bo yhÿ nikaranahaze simysapybyitsa nikaranahaze iwaze Deus nisiokzohik. Anaharere humo hi yhÿ nikaranahaze batu zikaha. Abaka Deus harere ezytyk wasani iwaze iokzeka mysapyrëtsa tsi-moziknaha. Kiristu myzubaha sapyzekenihyrikosokda iwatsahi ihumo mekywa tu tsi-moziknaha. Sudeutsa, Sudeutsabyitsa kino niwatihi abaka atsaesubaha tsimyzurukunaha. Iharere bo zuba yhÿ tsimykaranaha iwatsahi taharapepokzitsikinaha hÿ. Iwa Deus okzeka mysapyrëtsa tsi-moziknaha. Katsa ikiahatsa kino niwatihi Deus tyryktsa tsimaha.

¹⁶ Kiristu iharapatawyhyta humo zihyriziknahaze nihyrikosokda kytsa sizubarëtsa sapyzekenihyrikosokda iwaze Deus simysapybyitsa nikaranahaze nisiokzohik. Abaka Deus Sesus tuktsa bo mysisapywyky. Asaktsa Sudeutsa, Sudeutsabyitsa kino niwatihi Sesus tuktsa sizubarëtsa mysisapywyky. Ihumo myspirikporëtsa Sesus harere bo zuba hyÿ tsimykaranaha iwatsahi batu mysukyrytsitsa tsimaha. Ihumo taharapepokzitsikinaha, Sudeutsa Sudeutsabyitsa kino niwatihi, abaka atsaesubaha ityryktsa tsimaha.

¹⁷ Sesus Kiristu mybarawy bo inasik iwaze Deus wasania ty tsiwabynaha. Tapara ikiahatsa Sudeutsabyitsa Deus harere batu ahahyrinymyry abaka Deus wasania

ty tsiwabynaha iwatsahi ahakurētsa. Katsaktsa niwatihi tapara Deus harere Moises ziwatahaka ana humo hi myhyrinymyrētsa. Abaka Deus wasania ty tsiwabynaha iwatsahi mykurētsa. Deus Sesus humo batu iakyri, myhumo batu iakyri iwa ityryktsa tsimoziknaha. Deus Sesus tuktsa sizubarētsa mysisapywyky batu iakyri. ¹⁸ Kiristu mysapyzekenihyrikosokda iwatsahi mykurētsa Deus myzokzeka mysapyzekeniyzik. Ihyrikoso mybo natasapy. Sesus humo myspirikporētsa iwatsahi Deus bo tsimypamykysonahaze myharere piwabyky.

¹⁹ Iwaze ahakurētsa tsimoziknaha. Abaka Deus tyryktsa tsimaha. Ikiahatsa taparaka bipyritsa abaka batu, Deus tyryktsa tsimoziknaha. Deus hyrytsa tsimaha.

²⁰ Ikiahatsa Sesus Kiristu mypehakatsa tuktsa tsimaha. Katsaktsa Deus ykzohotsa wasania ty ahabo tsinatsasokonaha iwatsahi Sesus humo ahaspirikporētsa tsimaha. Deus sohokotsa niwatihi siharere bo hyĩ tsimykaranaha. Ikiahatsa Sesus humo ahaspirikporētsa iwatsahi katsaktsa mysopyk mytuk kytsa tsimaha. Hawa kytsa wahoro mozoknikinaha haraharetsa mysizozokonahaze kywa anawahi myharere Deus sohotsa sihyrinymyrykytsa kino niwatihi Sesus tuktsa siharere bo hyĩ mykaranahaze Deus tyryktsa moziknaha. Hawa kytsa wahoro mozoknikinahaze tapara harahare tsiziurēta zik mahaze ustsaharaharetsa ty ibaze zozo mykaranaha wa. Ata harahare tsiziurēta humo ustsaharaharetsa buruhuwa babatu zozozo mykaranaha. Sesus Kiristu hi harahare tsiziurēta wata atakta tapara piziknahaze tawata iwaze ituktsaharaharetsa watsa ihumo buruhuwa zozozo mykaranaha iwaze Deus tyryktsa tsimoziknaha. Sesus Kiristu humo atahi myhyrizikwanita.

²¹ Hawa kytsa haraharetsa iharahorokwytsa ty, hwitsa iwa wahoro humo zozozo mykaranaha ana waha Deus

Sudeutsa, Sudeutsabyitsa kino niwatihi kytsa sizubarëtsa ityryktsa moziknaha.

²² Tapara Deus wahoro zubata anaeze ziknapykyryk. Abaka Sudeutsa, Sudeutsabyitsa sizubarëtsa situk mynapykyryk. Deus hyrikoso situk mynapykyryk iwatsahi sizubarëtsa Sesus harere bo hyÿ mykaranaha ihumo sispirikporëtsa moziknaha, situk mynapykyryk. Iwahoro zubata wata my. Ikiahatsa Sesus harere bo hyÿ tsimykaranaha ihumo ahaspirikporëtsa tsimoziknaha iwaze ahasopyk mytukytsa. Deus hyrikoso mytuk atsaesubaha mynapykyryk katsa Deus wahoro zubata watsa tsimaha.

3

Pauro Sudeutsabyitsa bo tarabaja nikara.

¹ Iwaze uta Pauro ahatsyhyryze Deus bo mopamykysoikik. Ikiahatsa Sudeutsabyitsa ahahumo kamypokzitsiarëta. Deus wasania ty ahabo iktsasoko iwatahi kytsa katsipa humo zikoktyhyryknaha, siakyriukrënikitsa hurukwy bo zikoktyhyryknaha. ² Deus imysapyrënikita my wasania ty ahabo zikpehahik ana soho botu ziwatahaka. Ana kino kok tsiwabynaha.

³ Tubabatu Deus tihi:

— O tapara Sudeutsa zuba katyryktsa abaka kytsa Sudeutsabyitsa kino niwatihi katyryktsa moziknaha mysitsihikik — niy. Ana harere humo hi batu kahyrinymyry. Batu aty tohi hawa nizihikikze batu ihyrinymyry. Kyze Deus kape niy:

— Pauro Sudeutsabyitsa bokta! Wasaniha ty sibo tytsasokta! Asahi katyryktsa moziknaha mozihihikik, iwatahi sibo papeha my — niy.

⁴ Hyÿ iky. Deus soho kabo nitsasoko ana soho humo hi ahabo tsikaeni zuba botu ziwatahaka.

⁵ Deus Sudeutsabyitsa soho mozihikik kytsa batu sihyrinomyry. Aba zuba Deus ykzohotsa bo, isohotsitsa iwatsa taharere soho ihyrikoso humo nisihyrinomyryky hỹ. ⁶ Sudeutsabyitsa tu Deus wasania ty Sesus harere bo yhỹ mykaranaha zeka Sudeutsa atsatu maha. Sudeutsa sisopyk mytukytsa maha. Deus isapyrēnikia ty Sudeutsa bo botu nitsasoko, ana kino Sudeutsabyitsa bo niwatihi mysisapywyky. Iwaze Sudeutsa, Sudeutsabyitsa niwatihi asahi sizubarētsa Sesus harere bo hyỹ mykaranaha ihumo sispirikporētsa astsa watsatu maha sibo hi Deus mysisapywyky hỹ.

⁷ Deus wasania ty Sesus soho motsasoikik nawa kahyrikiztsokzawy my. Utakta Deus tsyhyryze tarabaja mykara. Kahyrikiztsokzawy humo ziktsumuēhĩkĩ. Izikwy humo zuba tarabajaziu mykara, Deus kahumo tsimypokzitsiarēta iwatahi zikpeha kytsa sizubarētsa bo wasania ty motsasoko.

⁸ Taparaka uta kamysapybyita tu ziknakara abaka mahani. Sesus tuktsa simysapyrētsa maha. Taparaka Sesus tuktsa humo kakyrirēta ziknakara. Deus hi kahumo tsimypokzitsiarēta iwatahi zikwatawy. Sudeutsabyitsa bo zikpeha iwaze wasania ty sibo motsasokoro. Kiristu koikny baktatu hawa tisapyrēna ituk zuba mynakara, ana soho humo batu myhyrinomyry. Abaka Deus harere wasania ty motsasoko. Kiristu isapyrēnikia ty myhyrinomyrētsa anahumo hi Deus zikpeha.

⁹ Tapara Deus mybaratsa harere ty batu tyso. Aiba zuba tsasohowy kytsa sizubarētsa bo mysihyrynymyry tsihikik iwatahi zikpeha. Iharere motsaso ana humo hi zikpeha. ¹⁰ Iwa niy. Deus hyrinomyrywy baba ty myzubaha bo motsaso tsihikik. Sizubarētsa bo ihyrinomyrywy baba motsaso tsihikik. Bijoiupe iknytsitsa sitsumuēhĩtsitsa sibo motsaso tsihikik. Hyrikoso sapybara watsa niwatihi sibo

motsaso tsihikik. Abazubatsa Sesus tuktsa bo iktsa mynakanahaze Deus soho sihyrinymyrëtsa. Sesus tuktsa sisapyrëtsa moziknaha iwaze sizubarëtsa Deus hyrinymyrywy baba humo sihyrinymyrëtsa hÿ. Sesus harere bo hyÿ tsimykananaha sibo Deus hyrinymyrywy baba motsasokonaha.

¹¹ Hawa Deus mytsaty nikara, atsatu wasani mykara. Abaka Sesus Kiristu harere bo hyÿ tsimykananaha zeka Deus hyrytsa tsimoziknaha, Deus sohowy atsatu wasani my. Iwaze ihyrinymyrywy baba atsaesubaha bo ziwatawy.

¹² Iwaze mypehakatsa harere bo hyÿ tsimykananaha iwa tsimyzurukunaha. Abaka batu mpypyby. Iwatsahi Deus bo tsimypamykysoikiknaha. Atahi mymywabyky. Atahi mymykusukniki. Ibo hyÿ tsimykananaha iwatsahi myspirikporëtsa abaka batu mpypyby.

¹³ Iwatsahi ahakurëtsaktsa! Kaharere tsiwabyziukunahaktsa! Deus wasania ty ahabo iktsasoko iwatsahi kytsa piksukyrykynaha. Kahumo ahasukatsihik byihuja! Deus pahasapywyky iwatahi kakurëta. Ahatsyhyryze sinini mykara ikiahatsa humo tisapyrëna iwatahi kakurëta my.

Hawa Kiristu myhumo tsimypokzitsiarëta.

¹⁴ Iwatahi ahatsyhyryze myzo bo mopamykysoikik. ¹⁵ Deus myzo koikny baktatu mynakara katsaktsa Sesus tuktsa ihyrytsa tsimaha. Asahi myzubaha bijoikpe eze tu mybarawy ezektsa kino niwatihi ihumo sispitu maha. Myzubarëtsa ihyrytsa tsimaha hÿ. ¹⁶ Ahatsyhyryze ipe my:

— O myzo ikia zuba tsapunihikrëta. Azikwy tisapyrëna. Ahyrikoso Epeso ezektsa tuk mynapykyryk asa kino ihumo sipunihikrëtsa moziknaha.

¹⁷⁻¹⁸ O myzo tysitsumuëhikta. Iwa tsimykaraze aharere bo hyÿ mykananaha, iwa Sesus situk mynapykyryk ana

kino myzapykyky. Hawa hwi puëtsikbyita iharatatsa zihiboani iwatahi ba ziknatsihipetok. O myzo Epeso ezektsa Sesus tuktsa ikia humo sipunihikrëtsa moziknaha. Iwa hwi iharatatsa zihiboani watsa asaktsa Sesus harere bo hyÿ mykaranaha ikia humo sipunihikrëtsa moziknaha. Iwaze asaktsa batu tyso Sesus myhumo tsimypokzitsiarëta ja. Batu mynyhy. Iwa batu tyso. Sesus myhumo tsimypokzitsiarëta ana kino myhyrinymyrëtsa maha hÿ. Sispirikorëtsa tybyi zubataha.

O myzo Sesus tuktsa myzubarëtsa ahumo tsihyrinymyrytohikta! Kiristu myhumo tsimypokzitsiarëta hÿ ana humo kino tsihyrinymyrytohikta. Sesus mymypokzitsiki ba zipyk tawahi myhumo tsimypokzitsiarëta. Ana kino sihyrinymyrëtsa hÿ ana humo hi mozihikik. Iwa batu aty tohi hawa Sesus myhumo tsimypokzitsiarëta tsihyrinymyrëta babata.

¹⁹ O kazo isapyrënikia ty sibo tsinyny tsihikik ana kino botu tsiktsaso. Aharere isapyrënikia soho atsatu wasani sitsyhyryze myzapykyky – my.

Iwa Deus myzo bo ahatsyhyryze mopamykysoko.

²⁰ O Epeso ezektsa Sesus tuktsa Deus bo tsimysakibazikiknahaktsa! Ipe tsimaha:

— O myzo ahyrikoso mytuk mynapykyryk hÿ. Iwaze ahyrikoso humo azikwy mytuk mynapykyryk iwatsahi mykurëtsa hÿ. Ikia zuba tsamysapyrëta. Ikia zuba apunihikrënikita. Ikia zuba amysakihikynikita. Hawa abo tsimyzapykykynahaze Sesus humo yhÿ tsimykara. Hawa mytsaty tsimykaranahaze ana humo hi tsihyrinymyrëta. Katsa tsimyzapykytohinahaze mymytsumuëhikÿ azikwy tisapyrëna hÿ.

²¹ O myzo katsaktsa Sesus tuktsa ikia bo mywahi tsimysakibazikiknaha. Sesus Kiristu mymypsapywyky

iwatsahi atuk mywahi tsinapykyryknaha hỹ. Yhỹ tsimaha — iwa myzo bo tsiksakibazikiknaha hỹ.

4

Sesus tuktsa atsatu ty mytsaty mykaranaha.

¹ Utakta Sesus soho iktsasoikik naha humo siakyriukrēnikitsa hurukwy bo zikoktyhyryknaha.

O kytsa kaharere bo wabyziutaha! Deus hi zahawatawy iwatsahi ihyrytsa tsimoziknaha iwaze wasani tahaktsa!

² Katsa zuba myhyrinymyrētsa batu ahasopyk. Aha-hokani byrihuja. Ahakubyrisorokuja! Batu ahabo zuba tsimykaranaha tyharape pokzitsikinahaktsa!

³ Myzo hyrikoso mymysapywyky iwatsahi mykurētsa tsimykaranaha. Katsaktsa atsa botu mytsaty tsimykaranaha iwatsahi aharape hahokbyitsa abaka tyharape pokzitsinaha. Ahape tu ahasopyk:

— Utakta Sesus tuktsa mysisapybaka. Yhỹ wasani mysisapy tsihikik — my. Iwa Deus myhumo mozihihikik.

⁴ Myzo nimywatawy iwatsahi ituk mywahi tsimynapykyryknaha. Nimywatawyze Sesus humo myspirikporētsa tsimoziknaha, iwaze Deus hyrytsa tsimoziknaha. Kiristu harere bo zuba hyỹ tsimykaranaha iwa tsimyzurukunaha. Deus hyrikoso estuba zubata atahi mytuk mynapykyryk. Deus hyrikoso estuba zubata atahi mytuk mynapykyk zeka Kiristu nury estuba zubata tsimaha. Iwatahi kytsa Kiristu tuktsa soho:

— Asaktsa Sesus nury maha — my. ⁵ Sesus Kiristu mypehakatsa atazubata my. Astatu mymyoktyrykta my. Kytsa nimyharasusuhiknahaze Sesus Kiristu mektsa botu nisiwatawy.

⁶ Deus zuba koikny baktatu atazubata my. Atahi mypehakatsa. Izikwy mytuk mynapykyryk iwa mymytsumuēhĩkĩ. Atahi tawahi mytuk mynapykyryk hỹ.

⁷ Kiristu myhyriziktsokzawy humo nimywatawy ana humo hi mymytsumuēhīkī. ⁸ Tubabatu Kiristu mybarawy bo izumuze Deus sohokotsa botu ziwatahaka:

— Bijoikpe bo ziksizoze tasukyrytsitsa nisioktyhyryk.

Ipunihikrēnikita tu tasukyrytsitsa sizubarētsa tatuk nisioktyhyryk.

Abaka iharere bo zuba yh̄y nikananaha.

Iwaze bijoikpe bo ziksizoze isapyrēnikia ty tatuktsa bo nyny my — niy.

Iwa botu ziwatahaka, aba zuba wasani my.

⁹ Hawa Kiristu nidoze Deus sohokotsa ziwatahaka. Tapara Kiristu mybarawy bo inasik iwaze nido. ¹⁰ Atakta Sesus bijoikpe ikny mybarawy bo inasik astatu bijoikpe bo nido. Nanabyitaba mypehakatsa myhyrizikwani mozik. Mypehatsa abazubata iwaze ihumo mybarawy tisapyrēna mozik. ¹¹ Atakta Kiristu wastuhu kytsa nisiwatawy. Ispe niy:

— Ikiahatsa kakzohotsa tsimaha iwatsahi Deus wasania ty tytsasonaha kytsa tysihyrinymyry — niy.

Kytsa Sesus humo sispirikpobyitsa bo Deus wasania ty motsasonaha. Iwa Deus tuk mynapykyknaha iharere humo sispirikporētsa moziknaha. Nanabyitaba Deus wasania ty tsimytsasonaha.

Utsa kytsa nisiwatawy. Ispe niy:

— Ikiahatsa Deus sohokotsitsa kaharere Sesus tuktsa bo tytsasokonaha — niy.

Utsa kytsa niwatihi nisiwatawy. Ispe niy:

— Ikiahatsa wasania ty ziknapamykysokonahatsa tsimaha. Nanabyitaba sizubarētsa bo wasania ty tsimytsasonaha — niy. Utsa kytsa niwatihi nisiwatawy ispe niy:

— Ikiyahatsa tsinymyrykynahatsa Sesus tuktsa tysi-hyrinymyry. Tysisapywykynaha sihumo tynasipokzitsikinaha — niy. Iwa my. ¹² Iwaze tyharape pokzitsikinaha. Siharere humo ustsas Sesus tuktsa tynasitsumuēhī tsihikiknaha. ¹³ Katsaktsa Kiristu watsa tsimoziknaha, ana hi Kiristu mozihikik. Hawa tisapyrēna my Kiristu mykara. Kyze mopyk tsawa ihumo myhyrinymyrētsa. Katsaktsa atsatu tsawatsa mytsaty tsimykaranaha. Deus tse Kiristu isapyrēnikia soho humo myhyrinymyrētsa hỹ. Iwaze katsaktsa ustsas Sesus tuktsa niwatihi atsaesubaha iwata tsimoziknaha hỹ.

¹⁴ Kyze Kiristu humo myspirikporētsa tsimykaranaha iwatsahi iharere humo myhyrinymyrētsa. Ihyrinymyrywy baba humo myhyrinymyrētsa. Ustsas mymypsihikbatakanaha zeka batu waby tsimaha. Ustsas mybarapetu mykaranaha zeka siharere humo hi batu hỹ tsimaha. Katsaktsa jabyitsa sopykbyitsa asahi paikpa mytsaty mynakaranaha. Katsaktsa Deus harere bo zuba hyỹ tsimykaranaha. ¹⁵ Ihyrinymyrywy baba humo zuba yhỹ tsimykaranaha. Iwa tyharape pokzitsikinaha. Sesus myharek wata tsimaha. Iwaze katsa wasanitsa tsimoziknaha.

¹⁶ Sesus Kiristu myhumo tsimypokzitsiarēta iwatahi mybo tawahi myzisapywyky. Parakbaha mysitsumuēhīekik. Iwatsahi katsaktsa niwatihi ustsas bo tahatsumuēhīnahaktsa! Katsaktsa inury tsimaha. Myni mypoiktsa humo pyryk pyryk mahaze kyik rikto maha. Myni byizeka batu kyik rikto zikaha. Anawata Sesus tuktsa estuba estuba zubata tahahyrikzitsokzawy tsimykaranaha iwaze katsaktsa Sesus harere bo hyỹ tsimykaranaha ihumo myspirikporētsa tsimoziknaha. Kytsa simysapyrētsa moziknaha myharere humo iwa tahatsumuēhīnaha hỹ.

Iwatsahi taharapepokzitsinahaktsa!

Hawa Kiristu harere bo hyĩ tsimykaranaha ihumo myspirikporëtsa, meky watu tsimoziknaha.

¹⁷ O katukytsa kaharere bo wabyziutaha! Mypehatsa Sesus harere ahape my. Kytsa Deus soho humo sispirikpobyitsa watsa batu ahasopyk. Asahi paikpa mytsaty nikaranaha kytsa harere humo zuba yhyĩ mykaranaha. Ikiahatsa batu. Niwazubaktsa. Siwatsa batu hyĩ zikaha.

¹⁸ Asaktsa Deus harere bo batu hyĩ niaha, iwatsahi batu sihyrinomyry. Batu ma zikaha Deus hyrinomyrywy baba humo batu sihyrinomyry iwatsahi kytsa miwa eze nizaranahatsa watsa niyziknaha. Siharerehakyrëtsa asaktsa hawa mykaranaha batu sihyrinomyry. Deus harere humo batu sihyrinomyry, iwatsahi paikpa mytsaty mykaranaha. ¹⁹ Nisikpybybyinahatsa hi ustsá bo mysisapybyrikinaha. Tsösĩ zikuikik naha tsahi ihyrizikt-sopyryryk izumu. Nahapewohiknaha. Sisapybyikitsa tihi nikaranaha.

²⁰ Ana hi Sesus Kiristu soho humo batu ahahyrinomyry. Ahamysapybara tsimoewynahaktsa! ²¹ Kytsa Sesus Kiristu harere bo zuba hyĩ mykaranahaze simysapyrëtsa moziknaha. Ana hi botu tsiwabynaha. Ana humo hi tsikahahyrinomyrykynaha iwaze ikiahatsa ahamysapybyitsa tsikykaranaha tsimoewynaha. Myharere tyziwabyziukunahaktsa hyĩ.

²² — O katukytsa! Taparaka amy ty batu imysapybara zuba tsikzihikiknaha. ²³⁻²⁴ Anabo hi wasani mytsaty ahabyitsa tsikykaranaha. “Iwa tsimaha zeka ahakurëtsa tsimaha ahape tu ahasopyk” mybarapetu tsikykaranaha.

Ana kino batu imysapy iwatsahi batu ahaku. Iwa tsikzurukunaha. Ahasopyk meky watu tsimyzurukunaha. Ahasuk ibykta mysykbaik zeka typapykik kyze ahasuk ezytyk ty korobyk tsimaha. Atawahi ahasopyk batu imysapy tsmoewynaha. Mekywa tu tsimoziknaha. Ahasopykwy ezytyk Sesus humo mytsaty tahaktsa! Sesus tuk tsimyzurukunaha! Ahasuk ezytyk ty korobyk tsimaha asa watsa tihi Sesus sopykwy humo zuba tsimyzurukunahaktsa! Iwaze wasani my tsimykaranaha. Hawa tsimyzurukunaha Kiristu wata tsmoziknaha iwa tsikahahyrinymyryknaha hỹ – my.

Hawa Kiristu ziknakara ikia niwatihiktsa!

²⁵ — O katukytsa! Taparaka ahamyspihikbatarētsa ziknakanaha. Abaka ahamyspihikbata byihuktsa wasape tynakanaha. Hawa wasani haty zuba tsimykaranaha hỹ. Katsaktsa atsaesubaha Sesus tuktsa tsimaha ana humo hi ahamyspihikbata byrihuja.

²⁶⁻²⁷ Kytsa humo ahakyri zeka niwazubakta! Haramwe junubabyizetu tynakokozonaha ahakoko byizeka Satanas harere bo yhỹ tsimykaranaha. Aty wahoro hokbowy zoksapare my zeka usta mytsuk, katsa mykoko byizeka Satanas mytuk mymykniki. Iwatsahi ahakyri byihuja.

²⁸ Aty ahatuktsa tsitsyhyryboarēta ziknakara zeka ustsanya ty ka tyakse akse byity. Abaka tarabaja tykta. Iwaze tsipanamy ustsanya kytsa bo nyny tsimy. Tsipanamyze hi wastuhu anamy ty sinamybyikitsa bo nyny tsimy.

²⁹ Asaktsa ahatuktsa siharerewabymybarētsa tu zeka niwazubakta. Ahaharere tisapyrēna humo zuba ustsanya bo tynapamykysonaha iwaze tyharape hapokzitsikinaha. Ustsanya bo tysitsumuēhīnaha hỹ. Iwaze kytsa ahaharere piwabynaha zeka: “O anaharere hi tisapyrēna my” maha.

³⁰ Iwa tsimyzurukunaha zeka Deus hyrikoso ahahumo tsakurēta mynapykyryk. Imysapybara

tyty tsimykaranaha zeka Deus hyrikoso ahahumo batu iaku. Deus hyrikoso zahawatawy iwatsahi Deus tyryktsa tsimoziknaha ahahyrinymyrëtsa. Hawa Deus hyrikoso imysapyrënikita my ikiahatsa niwatihi ihumo ahamysapyrëtsa tsimoziknaha. Ikiahatsa Deus hyrikoso tuk tsimynapykyknaha atahi bijoikpe bo mymyoktyhyryk. Deus ipe my:

“Hana puruze Sesus tuktsa kabo tysioktyhyk” my. Iwaze pahaoktyhyryk. Deus bo bijoikpe bo pahaoktyhyryk hÿ.

³¹ Iwatsahi pykyhytutaha! Harape humo ahaty kyri kyri byitaha! Ahape ty myija myija byitaha. Ahaty betsak betsak byitaha! Aty iotutsa pauksitsa humo takyriki tsiharerewabymybarëta mozik. Iwaze ana kino tsimoewynaha!

³² Ikiahatsa hi kytsa bo tysisapywykynahaktsa! Ahahyrikporëtsa tyharape pokzitsikinahaktsa! Ahamysapybyitsa tsikykaranaha Deus pahaokzohik. Sesus Kiristu humo Deus mymyokzohik ispirikt-sokdatawata my. Iwatsahi ikiahatsa niwathiktsa. Aty batu imysapy abo my zeka ikia imysapybara ty nikara tsiptokzohik, mahani byitatu tsimyzuruku. Ikspiriktsokdatawata. Deus ahamysapybyitsa tsikykaranaha Sesus humo pahaokzohik iwatsahi ustsata imysapybara tsiptokzohik hÿ Deus wata my — my.

5

O myzubaha Sesus watsa tsimyzurukunaha.

¹ Ikiahatsa Deus hyrytsa tsimaha. Atahi ahahumo tsimypokzitsiarëta hÿ. Iwatsahi ahamysapyrëtsa tsimoziknaha. Hawa kytsa hyrytsa tahazotsa mysisopykzukunaha ikiahatsa Deus watsa tsimykaranaha. Ahazo watsa tsimoziknaha. ² Ustsata tysisapywykynahaktsa!

Kiristu watsa tsipisapywykynahaktsa! Atahi myhumo tsimypokzitsiarêta iwatahi mysapyzeken nihyrikosokda. Tapara kytsa siraratsa ziknasibakanaha iwaze Deus bo ziknasiwezokonaha ana humo hi simysapybyitsa nikaranaha Deus nisiokzohik atawatsa Sesus nihyrikosokdaze mymysapybyitsa tsikykaranaha Deus ihumo nimyokzohik. Deus tihi:

— O Sesus Kiristu mybarawy ezektsa sapyzeken nihyrikosokda ta humo kakurêta. Hawa jokmorênikia waok myze kakurêta anawahi Sesus nihyrikosokda iwatahi ibo iktsa myze kakurêta my. Mybarawy ezektsa humo tsimypokzitsiarêta babata ziwatawy — niy.

³ Ikiahatsa hi Deus tyryktsa tsimaha. Iwaze hawa wasani zuba tahaktsa! Kytsa ahatukze ustsá okeza bo iktsa zuba taha. Taokeza zuba mysipyryrynaha. Wytykyryk kino niwatihi tahabariktsa humo zuba zik-tahasipihiknaha. Amy ty batu sisopyksapy wytykyryk nisiakzobyrikinaha batu mytsaty tsimykaranaha. Ahazokdi byihuja! Ahazokdibyitsa zeka mektsa namy ba zikzihikiknaha. ⁴ Ikiahatsa zuba wytykyryk nury soho tsimypamykysokonahaze ahamysupehe byihuja. Ahaharerewabymybarabyihu ja. Anawaze ahaharere humo ustsá kytsa bo batu mysimiywyky. Ahamykni byihuja tynapykyknaha. Wasaniha ty tsimaha zeka ikiahatsa Deus pe tihi:

— O ikia zuba tsamysapyrêta. Nawa nizukni tsizubarêna tisapyrêna iwatsahi mykurêtsa — tsimaha. Iwa tsimysasokonaha. ⁵ Atakta ustatsa bo tahyrizikwy zeka Deus tuk batu tawahi zikakpykyk. Wytyk usta maku bo tahyrizikwy zeka atatsa katsa Deus tuk batu tawahi zikykykyk imysapybara bo mytsaty mynakaranaha asahi Deus tuk batu tahawahi zikakpykyknaha. Ustsá namy tsihitsa watsa mynazihikiknaha batu Kiristu

tyryktsa asahi sizokdirētsa Deus tuk batu tahawahi zikakpykyknaha.

Kiristu harere bo zuba hyĩ tahaktsa kytsa!

⁶ Kytsa asahi Deus harere bo batu hỹ zikaha Deus tuk batu tahawahi zikykykyknaha. Kytsa ahape naha zeka:

— O hawa tsimyzurukunaha wasani tsimaha. Iwatsatu ahamysapybyitsa tsimykaranaha zeka ikiahatsa Deus tuk ahawahi tsimynapykyryknaha — mybarapetu nikaranaha. Anaharere batu wabyziu zikaha. Asaktsa mopamykysonaha zuba. ⁷ Siharere bo waby waby byitaha! Deus tihi:

— Kytsa kaharere bo batu hỹ zikahaze katuk batu tawahi zikapykyryknaha — my. Iwatsahi siharere bo ka waby waby byitahaktsa.

⁸ Taparaka wasaniha humo batu ahahyrinymyry. Kiristu harere humo batu ahahyrinymyry. Iwatsahi ahamysapybyitsa tsikykaranaha. Kytsa miwa Ezektsa watsa tsikzurukunaha iwatsahi Kiristu harere bo batu hỹ tsikykaranaha. Deus harere humo batu ahahyrinymyry hỹ. Abaka meky watu tsimykaranaha. Sesus Kiristu harere bo hyĩ tsimykaranaha ihumo meky watu ahaspirikporētsa tsimoziknaha. Hawa kytsa iwororo haburuk tu mokurunaha Ezektsa watsa tsinymyrykynaha iwatsahi imysapybara bo batu hỹ tsimykaranaha meky watu tsimoziknaha. ⁹ Ikiahatsa hi Kiristu harere bo hyĩ tsimaha zeka kytsa humo tahasapywykynaha. Wasani tsimykaranaha. Kytsa bo ahaspihikbata byihuja ahaharere wasani zuba tsimykaranaha.

Iwa Kiristu harere bo hyĩ tahaktsa! ¹⁰ Ahape tu ahasopyk:

— Hawa Deus mozihikik naha zuba tsimyzihikiknaha iwatsahi isopyk ty tanymyry tsihikik. Deus ykparawy humo tanymyryky — tsimaha. ¹¹ Kytsa Sesus harere

bo yh̄y ahabyi zeka sisopyksapybyitsa mykaranaha. ¹² Ikiahatsa batu situk tsimaha. Asaktsa kytsa watsa asahi miwa eze pyrikpyrik mykaranaha kytsa papatu simysapybyitsa mykaranaha. Simysapybyitsa nikaranaha ana soho tihi batu tyso. Mysikpybyr̄etsa simysapybyitsa nikaranaha humo. Ikiahatsa ispe tsimaha:

— O kytsa ahamysapybyitsa tsimykaranaha ana ty kino “niwazubakta” tsimaha — my.

¹³⁻¹⁴ Miwaka rika ty pok mahaze kywa mypubyize mynamy bo iktsa tsimaha. Anawahi Kiristu harere kytsa bo tsimypamykysokonahaze simysapybyitsa mykaranaha anasoho humo hi sihyrinomyr̄etsa. Ahaharere rika wata mozik. Iwororo ha eze kywa mypubyi mozik. Anawahahi Kiristu harere tsimytsasokonahaze kytsa simysapybyitsa nikaranaha nisihyrimyrykynaha iwaze iharere humo simysapybyitsa nikaranaha sityshyryze piwatawyky. Tapara aty zeka:

— Ikiakta tsipuruziukze popotyкта kyiktyкта ikia amysapybyita tsiky kara naha humo ibezehe tawata tsimy.

Tsakahazoziknahaktsa! Kiristu harere bo zuba yh̄y tahaktsa!

Hawa kytsa iwororo ha eze kywa mokurunaha ikiahatsa siwatsa tsimaha hawa wasani tsinymyrykynaha.

Kiristu harere humo wasanitsa tsimoziknaha — nikaranaha.

Iwa botu ziwataha.

¹⁵ Kaharere bo wabyziutaha! Ahape tu ahasopyk:

— O hawa haeze tsimyzurukunaha wasani ja tsimaha. Sispirikponikitsa — tsimaha. Iwa ahasopyk. Hawa tsimyzurukunaha pykyhytu tahaktsa! ¹⁶ Mybarawy eze ktsa simysapybyitsa mykaranaha. Ikiahatsa batu. Mekywatu tsimoziknaha. Kytsa tysisapywyikiknahaktsa! Tysitsumuēh̄inahaktsa. ¹⁷ Iwatsahi mypehaktsa

Sesus harere bo wabyziutahaktsa! Ahasopyksapy byihuja! Ikiyahatsa hi mypehakatsa harere bo mytsatyziu tsimynakaranaha iwatsahi iharere bo zuba hyÿ tsimykaranaha.

¹⁸ Tsôsî ty ka tsô tsô byitaha. Kytsa tsôsî ty pikukunaha zeka batu saku. Tahakyri humo sisopyksapybyitsa mykaranaha. Tsôsî humo batu imysapy mykaranaha. Ikiyahatsa batu. Deus hyrikoso ahatuk mynapykyryk ana kino tuzihikiknahaktsa!

¹⁹ Tsikzumubanahaze Deus bo tysakibazikiknahaktsa! Ikiya zubaze kino niwatihi Deus bo tysakibazikikta! Hawa taparaktsa Deus bo nisakibazikiknaha ikiahatsa kino niwatihi tsimaha. Hawa Deus sohotsitsa nisakibazikiknaha ikiahatsa atsatu tsimaha. Deus hyrikoso humo iharere tuk tsimysakibazikiknahaktsa! ²⁰ Iwaze nanabyitaba ikiyahatsa Deus bo tsimysakibazikiknaha. Ikiyahatsa tihi:

— O Deus myzo ikia zuba amysapyrënikita. Ikiya zuba apunihikrënikita, ikia amysakikynikita iwatsahi ikia humo ka mykurëtsa tsimaha — my.

Iwa Deus bo tsimypamykysokonaha hÿ.

Kytsa, wytykyryk kino niwatihi tuharape pokzitsinaha.

²¹ Kyze Deus harere bo yhÿ tynakaranaha. Sesus Kiristu harere bo zuba hyÿ tynakaranaha iwatsahi ahaspirikporëtsa tsimoziknaha. Utsa Sesus tuktsa harere bo kino niwatihi yhÿ tsimykaranaha.

²² Wytykyryk ikiahaka kino Kiristu harere bo hyÿ taha. Atsawatu ahapytsa harere bo yhÿ tynakaranaha. ²³ Kiristu mypehakatsa harere bo zuba hyÿ tsimykaranaha. ²⁴ Katsaktsa ituktsa tsimaha. Atahi myharek wata my. Katsaktsa inury watsa tsimaha. Sesus Kiristu tazo bo mymyoktyhyryk mykara. Iwatsahi iharere bo hyÿ tsimykaranaha. Atsawatu wytykyryk kino ahapytsa harere bo zuba tynakaranaha iwazahi ahapytsa ahapehatsa harere bo yhÿ tynakaranaha.

²⁵ Kytsa kaharere bo wabyziutaha! Ahaokeza humo ahamypokzitsiukoktsa! Tysitsumuēhñinahaktsa! Hawa Kiristu myhumo tsimypokzitsiukoktsa ikiahatsa kino niwatihi ahaokeza tysipokzitsinaha! Kiristu myhumo tsimypokzitsiarēta mysapyzekenihyrikosokda. Aparakbaha bo nihyrikosokda. ²⁶ Kiristu harere humo mysapyrētsa tsimoziknaha. Kytsa momurunaha zeka siziurētsa moziknaha. Atsatu Kiristu harere bo yhȳ tsimykaranaha zeka siziurētsa watsa tsimoziknaha. Iharere humo ahamysapyrētsa tsimoziknaha. ²⁷ Kiristu hi:

— O katuktsa katuk ahawahi tynapykyryknaha. Wasani tsimoziknaha. Ahamysapyrētsa tsimoziknaha anawahi mozihikik — niy.

²⁸ Atsawatu kytsa ahaokeza tysipokzitsinaha. Hawa Kiristu aparakbaha humo tsimypokzitsiukrēta iwatsa kytsa ahaokeza tysipokzitsinaha. Amy ty tisapyrēna tsimyzihikiknaha batu ahabo zuba zikaha. Isapyrēnikia humo ahaokeza bo kino niwatihi tsimyzihikiknaha.

²⁹ Isapyrēnikia ty ahaokeza tsyhyryze tsiberinaha niwatihi. Ikiatu tsizapokzitsiki. Araparēta zeka tsipadisaha. Arapukrēta zeka tsipuku. Iwatahi isapyrēnikia ty hyryk tsimy zeka atsatu ahaokeza bo nyny tsimy. ³⁰ Kiristu wata tsimoziknaha. Atahi namypokzitsihikik. Atahi:

— O katuktsa ikiahatsa kanurywatsa, iwatahi pahapokzitsihikik — my. Iwa mysopyk mykara. — Kiristu tatuktsa humo tsimypokzitsiarēta iwatahaktsa kytsa ahaokeza humo ahamypokzitsihu. ³¹ Deus harere mype maku tasukzaze tazo perek taje perek my. Taparaka atazuba zikzuruku. Tasukza zeka mahani, taoke tuk mynapykyryk. ³² Kiristu tuktsa humo tsimypokzitsiukrēta ana watsa hi kytsa tahaokeza humo simypokzitsiukrētsa.

Anasoho hi piwatawyky. Tapara ana soho humo batu myhyrinymyry aba zuba tsinymyrykynaha. ³³ Kiristu tatuktsa humo tsimypokzitsiukrēta babata, atawahi ahaokeza tysipokzitsinahaktsa! Tapara isapyrēnikia ty ahabo zuba hyryk zikaha, abaka batu, isapyrēnikia ty ahaokeza bo kino niwatihi taha. Wytykyryk ikiahaka ahapytsa harere bo yhỹ tsimykaranaha hỹ. Iwa tuzurukunahaktsa — niy.

6

Hawa sizotsa tahahyrytsa humo mysisakihikynaha.

¹ — O jabyitsa ahazotsa harere bo hỹ tahaktsa! Siharere tsiپیwabyziunaha zeka ma tsimaha. Ahajeza harere bo niwatihi hỹ tahaktsa! Siharere bo ma tsimaha zeka Deus ispe my: “O asaktsa wasani mykaranaha” — my. ²⁻³ Tubabatu Deus tyryktsa pe niy. — Ahazotsa harere bo hỹ taha. Ahamyharerewabyrētsa zeka aibani zuba tsimyhyrikosokdanaha — niy. Deus harere tisapyrēna iwatsahi ahazotsa ahajeza kino niwatihi siharere bo ma taha. ⁴ — O myzotsa ahahyrytsa humo ahahokani byrihuja ahaharere humo siakubyitsa mykaranaha. Siaku byizeka sioktsiukrētsa moziknaha. Ikiahatsa hi ahahyrytsa Kiristu harere humo tsihyrinymyrynaha. Iwaze Sesus sopyk wa mozurukunaha iwa ikiahatsa soho humo ahasopykwatu mykaranaha — my.

Hawa sipehatsa tahatsumuēhītsitsa humo sisopyk.

⁵ Abaka kytsa ahahyritzokzaharētsa kaharere bo wabyziutaha! Ahapehakatsa pahapehanaha zeka yhỹ tsimykaranaha. Sihyritzokzawy soho pahapehanahaze yhỹ tsimykaranaha. Ahape tu ahasopyk batu tyso. — O ana hyritzokzawy humo batu hỹ — tsimaha. Ahahyritzokzawy humo ahapykyhytutaha! Ahapehatsa harere bo yhỹ tsimykaranaha watihiki Kiristu

harere bo hyĩ tynakaranaha. ⁶ Tarabajaziu tykarana-haktsa! Ahapehatsa pahasukparanaha zeka tarabajaziu-taha. Ahapehatsa ahaty sukpara habyize kino niwatihi tarabajaziutaha. Kiristu tuktsa humo ahasopykziurētsa hỹ. Iwa Deus mozikik ana humo hi ahasopykziurētsa tsimoziknaha. ⁷ Ahape tu ahasopyk:

— O kahyriziktsokzawy kapehatsa bo mykara. Sesus Kiristu bo kino niwatihi. Iwatahi pisapybaka — tsimaha. ⁸ Sesus Kiristu mypehakatsa babata. Atakta abazubata. Mybarawy ezektsa pehakatsa babata my, atahi ihuak ty sihyriziktsokzawy humo kytsa aparakbaha bo nyny my. Anabo hi mytsatyziu tahaktsa kytsa! ⁹ O sipehatsa abaka ikiahatsa pe my:

— Asaktsa ahatsyhyryze ahahyriziktsokzawy humo mykaranaha tysisapywykynaha. Ahampybyty byihuja. Ahasakimyskry byihujataha. Asaktsa ahatsyhyryze tarabaja mykaranaha. Deus hyrytsa maha ikiahatsa kino niwatihi Deus hyrytsa tsimaha. Iokzeka astsabani. Iwatsahi ahakzoziuhuktsa! Myzo bjoikpe eze mybarawy ezektsa aparakbaha bo mysisapywyky. Ana humo hi ahaspiriktsokda byihuja kytsa! — my.

Deus sodadu suk imiokbyita wata ahabo nyny my, iwaze ahapunihikrētsa tsimoziknaha.

¹⁰ Aba pepykyk, kaharere ahabo motsaso pahatsumuēhĩ tshikik. Ahapunihikrētsa tsimoziknaha ana humo hi pahatsumuēhĩ. Ikiahatsa Sesus Kiristu humo ahaspihikrētsa iwatsahi ahaspirikporētsa tsimoziknaha. Atahi ipunihikrēnikita my ba hawa tohi zikzukninaha. Iharere bo ma tsimykaranaha zeka izikwy ahatuk mynapykyryk.

¹¹ Sodadutsa pehakatsa sisuk ty mekywahaty ty sodadutsa bo nyny my. Sisuk ty imiokbyita iwatsahi sisukyrytsita ba ziksibanaha. Deus zikwy mytuk

mynapykyryk. Iwatsahi mypunihikrētsa tsimoziknaha izikwy sodadutsa suk imiokbyita wata my. Katsahi:

— O myzo azikwy ty mybo nynytyny — tsimaha. Yhỹ mykara. Iwaze Satanas harere bo batu hỹ tsimaha Deus zikwy humo, Satanas pahaspihikbatakaze iharere bo batu hỹ tsimaha.

¹² Mybarawy ezeksakta mysukyrybyitsitsa maha. Hyrikoso sapybara watsa mysukyrytsitsa maha. Sinurybyitsa tu mysukyrytsitsa babatsa maha. Hyrikoso sapybara myhumo batu siakparawy mymysukyryikiknahatsa maha. Iwatsahi siharere bo batu hỹ tsimaha. Asaktsa mysukyrytsitsa babatsa hỹ. Asahi namysapybyrikinaha. Kytsa Sesus humo sispirikpobyitsa hi siharere bo yhỹ mykaranaha. Sizubarētsa mysipehakanaha iwatsahi sisopyk watsa mozurukunaha. Asaktsa Sesus harere bo batu hỹ zikaha sispirikpobyitsa tu hyrikoso sapybara pehakatsa sipehakatsa niyzik. Asaktsa unata zuba siakparawy kytsa papa tu simysapybyitsa tu nikaranaha iwaze miwa siakparawy.

¹³ Iwatsahi Deus zikwyty tsimyzapykykynaha. Sodadutsa sisuk imiokbyita watsa ikiahatsa hi Deus zikwy tsimyzapykykynaha. Deus zikwy ahatuk mynapykyrykze ahapunihikrētsa tsimoziknaha. Ahaspirikporētsa tsimoziknaha Deus zikwy humo hyrikoso sapybara harere bo batu hỹ tsimaha.

¹⁴ Mybarawy ezektsa niwatsorokonahaze sisuk ty mekywaha tu korobyk niaha. Sisuk imiokbara ty korobyk niaha iwatsahi sisukyrytsitsa ba ziksibanaha. Ikiahatsa sodadutsa watsa tsimaha. Tapara sodadu tasukpesuk ty izezehirēnikia ty korobyk niy. Tazikoikaĩwy ty haĩ niy. Ikiahatsa batu ahamyspihikbata. Wasani zuba tsimytsasonaha ikiahatsa sodadu zikoikaĩwy watsa. Iwaze wasani tsimyzurukunahaze ikiahatsa

sodadu suk imiokbyita ty korobyk niy tawata tsimaha. Hawa isuk imiokbyita humo ba zibezenaha, ikiahatsa wasani tsimykarana humo hyrikoso sapybara humo ahakyzohokbyitsa maha.

¹⁵ Deus mybarawy ezektsa humo tsimypokzitsiarêta iwaze wasania ty Sesus Kiristu soho tsimytsasokonahaze sodadutsa watsa. Sodadutsa pyrysuktsa ty simiokbyitsa ty korobyk maha siwatsa tsimaha.

¹⁶ Sesus Kiristu humo ahaspirikporêtsa! tsimynakaranaha. Ihumo tsimyspirikponahaze sodadutsa watsa tsimaha. Sodadutsa orokpedawy imiokbyita. Iwaze sisukyrytsitsa orobiktsa ty iharazôrô ba zizaknaha. Atawahi hyrikoso sapybara pehakatsa mybo nimykozokik iwatahi imysapybara myhumo nazihikik. Niwazubakta! Katsaktsa Sesus Kiristu humo mspirikporêtsa imysapybara humo ba hỹ tsimaha.

¹⁷ Sesus Kiristu mymyoktyhyrykta tazo bo mymyoktyhyryk. Sesus watsa tsimoziknaha ana hi mozihikik. Taperykyze sodadutsa watsa. Sodadutsa tsorik imiokbyita taharek humo pu maha. Ikiahatsa hawa mytsaty tsimykarana pykyhytutaha. Iwaze Deus harere humo mytsaty tynakaranahaktsa! Deus hyrikoso iharere ty pahahyrinymyryky iwatsahi ikiahatsa sodadutsa watsa tsimoziknaha. Sodadutsa sokorotsapuzeze tyryeze kihwa. Hawa sodadu isukyrytsa nisiba sokorotsapuzeze tyryzekihiwa ty ikiahatsa Deus harere humo Satanas harere nepykba.

¹⁸ Deus bo tynapamykysonahaktsa! Hawa Deus hyrikoso mozihikik ana hi tyzapykynahaktsa! Ahazikara byihuja tsiperykynahaktsa. Deus bo typamykysonaha. Tsibytuhukutunaha. Ikiahatsa tihi:

— O myzo Sesus tuktsa tsyhyryze tsimyzapykynaha. Nanabyitaba atyryktsa tsyhyryze tsimyzapykynaha.

¹⁹ Asaktsa mysitsumuēhĩ. Pauro kino niwatihi tsipitsumuēhĩ. Hawa wasania ty Sesus soho motsasoko tsipitsumuēhĩkĩ iwaze ustsá kytsa bo ihumo sihyrinymyrētsa moziknaha. Tsiakusukniki. Atahi ahumo ipybybyita tu wasania ty motsasoziú! myzo tsimaha — my. Taparaka Deus Sesus Kiristu soho humo batu mymyhyrinomyry abaka kytsa sizubarētsa mymyhyrinomyrykynaha.

²⁰ Deus zikpeha iwatahi iharere motsasoikik. Abaka iharere humo kytsa siakyriukrēnikitsa hurukwy bo zikoktyhyrykynaha. Iwatsahi Deus bo katsyhyryze tsimyzapykyikiknaha. Wasani mykara ana hi ibo tsimyzapykyikiknaha. Ikiáhatsa tihi:

— Myzo azikwy ty Pauro bo nyny tsimy iwaze aharere motsasoziuku. Ipybybyita azikwy humo tsipunihikrēta mozik — tsimaha.

Aba mopykykze kytsa bo mytsaty mykara.

²¹ Tikiko kasoho ahabo motsaso. Ata humo kamy-pokzitsiarēta mytsy babatawa my. Mypehatsa Sesus tsyhyryze tarabajaziú mynakara. Tsiakzoziurēta tarabaja my. Tsiakubyrisorokrēta. ²² Iwatahi ahabo pipeha, hawa mynakara ana soho ahabo motsaso. Iwaze ikiáhatsa batu tyso:

— Pauro ja. Yh̄y ja — tsimaha. Atahi ikiáhatsa tuk mopamykyso.

Deus pahasapywyky.

²³ Deus bo ahatsyhyryze mopamykysoikik. Ipe my:

— O Deus myzo, mypehakatsa Sesus Kiristu niwatihi ahyrytsa bo tysisapywykynaha. Ba paikpa mytsaty zikaha, ikia hi tysiakuwyky. O myzo tysitsumuēhĩ ustsá kytsa wasani sisopyk. Sesus Kiristu harere bo hȳy

mykaranaha iwaze ihumo mospirikpotohinaha iwa tysit-sumuēhīkta!

²⁴ O myzo tysisapywyky. Amy humo siaku byizeka sibo tyzapykykta iwaze atuk tahawahi mynapykyryknaha. Sesus humo sipunihikrētsa moziknaha — my.

Iwa Deus bo ahatsyhyryze mopamykysoikik. Nepyk niwazuba.

Pauro

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
